

欽定平定教匪紀略

欽定平定教匪紀畧卷十

十月初九日

壬寅

陝甘總督那彥成奏言竊

臣欽

奉

恩旨督辦軍務承

命祇懼夙夜籌維除馳抵衛輝會同楊遇春悉心商

辦外茲於途次採訪輿論并

臣

管窺所及擇其

尤緊要者六條奏呈

御覽是否有當伏乞

皇上睿鑒詳細指示一籌辦三省防堵查此次賊匪
滋擾係在平原漫衍之區南有黃河北有滹沱
漳河惟將兩岸渡船嚴飭毋許傍岸則賊匪必
不能飛渡查河南之衛輝彰德爲九省通衢商
賈絡繹文報往來似應留大員帶兵駐守以安
民心而山東濟寧運河一帶爲糧艘經行之地

關係尤重臣行抵西安見四川提督多隆武據稱現已奏請隨營該員曾任兗州鎮熟悉東省情形又西安鎮閆俊烈係山東人打仗勇往臣擬到營卽派該二員前往山東帶兵截剿仍請勅下河督帶領河標之兵在正東徐州鎮帶本標兵在南面兗州鎮及德州滿漢營各帶本營兵在北面均於運河附近各處防堵一酌定進兵道

路查溫承惠在大名一帶剿賊獲勝賊匪勢必
奔竄東境又聞高杞連獲勝仗之後因兵少力
單未能痛剿臣所帶各兵連日加緊催餉計月
半以前總可到齊臣自應由衛輝一路自西向
東兜剿俟西路肅清後再會溫承惠等合剿至
北面附近

神京實爲緊要溫承惠等自應駐紮未便窮追至

山東則數路進兵一切糧草應請

勅下同興上緊接濟以期無誤一請寬宥脅從查現
在從賊匪徒卽素日並未習教亦當誅戮其習
教而不從謀反者原情仍係良民臣斷不敢稍
存姑息之見但恐愚民因辦理過嚴致生疑懼
而首逆轉得借此搖惑伏乞

皇上明降諭旨凡習教而未經從賊者地方官不得

因教匪滋事概與株連遍貼謄黃俾愚民免致
煽惑一請團練義勇查附近賊匪之區居民自
必各思保衛若卽勒令自爲團練到處聯絡則
官兵跟蹤剿捕團勇卽可堵禦民氣日盛賊膽
愈寒不致肆行擾害一請暫緩堵築漫口近聞
睢寧一帶河堤衝缺自應趕緊修築惟一經興
工卽需雇募多夫難保無賊匪混雜偷渡南岸

煽惑應請暫緩築堵仍令河督帶兵防護運道
一請普設粥廠查直隸山東河南今歲收成歉
薄乏食貧民裹脅較易若處處設廠煮賑饑民
有所依歸自可各安生業請飭地方官實力辦
理奏入

上命軍機大臣傳諭那彥成曰據那彥成奏陳各條
朕詳加披覽其言有甚是者有不可行者如第一

條內所稱賊匪滋擾之處南有黃河北有滹沱漳
河將兩岸船隻不許傍岸則賊匪不能飛渡等語
那彥成未至軍營於現在賊匪情形尙未能深悉
豫東兩省賊匪屯聚之所總在濬滑曹定一帶毗
連直隸之開州東明長垣三處南距黃河尙近已
令將船隻停泊南岸嚴查渡口至漳河則距賊已
遠滹沱河則更在正定地方隔越順德廣平大名

三府相去數百里之遙豈能將船隻盡行停渡其所請將多隆武閔俊烈二員帶往派令管帶山東兵丁盡力截剿則所辦甚是此次剿捕賊匪山東一路帶兵將領不能得力朕深爲廝念多隆武閔俊烈二人朕素知其勇往卽令其馳赴山東幫同同興帶兵奮力截剿則東面可免疎虞其東南一面有沈洪在彼堵截並有旨諭令百齡派兵策應

該大臣飭令多隆武等探明賊蹤迎頭截擊勿令
四散奔竄卽可逼歸一處痛加殲戮其所請河督
帶河標兵在東德州滿漢營兵在北於運河附近
防堵均可不必河標官兵素本輒弱德州兵自有
本汛地面均無庸紛紛調遣轉令各處居民徒增
驚擾其第二條所請於衛輝一路進兵自西向東
兜剿據聞高杞兵單先將西路肅清再與溫承惠

合剿所辦甚合機宜至所稱北面緊要應留溫承
惠駐紮不便窮追所見亦甚是昨已有旨令溫承
惠酌量情形帶領富蘭等在長垣東明開州一帶
嚴防後路並搜剿餘匪卽令欽遵辦理其第三條
請明降諭旨將習教而未經從賊者不得因教匪
滋事概與株連等語愚民習教甚多豈能概行誅
戮此時大兵剿捕原係專辦起事亂民並未指稱

查拏邪教其平素未經習教而此時從賊抗拒者
卽在應誅之列若此時並未附賊止於平素習教
原不在誅夷之內但此事區別甚難朕聞賊匪偽
詐百出有日間貌爲良民而夜間隨賊搶掠者此
時不能明降諭旨顯爲剖判全在伊等飭令將領
官兵于接仗之時留心區別凡被脅良民散出投
誠者則賞其一死至持械抗拒者則盡殺無赦總

不許揚言邪教二字則百姓自不生疑懼地方官亦不敢株連矣其第四條請辦理團聚義勇衛護鄉閭此正堅壁清野之義非若招募鄉勇隨征致有流弊前已降旨飭令直隸豫東三省一體妥辦矣其第五條請暫緩修築河工一節目下賊氛未靖睢工距河北甚近恐人夫混雜致有疎虞昨已降旨停工那彥成能見及於此所慮甚是其第六

條請設粥廠普濟饑民以杜賊匪裹脅則所見未
免迂濶三省歉收之處業經分別蠲緩賑濟至現
在糧餉緊急欲再於五六十州縣概添粥廠非徒
力有不能且事尤有所不可試思賊匪當滋事之
際隨處裹脅若將粥廠設於遠處則近賊地方乏
食貧民依然被其裹脅若設於近賊之處則賊匪
皆來溷跡廠中愈可飽颺豈非藉寇兵而齎盜糧

乎此事斷不可行總之此時辦賊之法以剿捕迅
速爲主近年國家經費不足那彥成豈不深知況
平賊之後又有河工加以賑濟實屬拮据若日久
遲延恐形支絀且賊匪到處焚掠戕害生靈若不
及早翦除則良民受其荼毒者益多目下天氣漸
寒斷不可再有遷延以現在賊情而論雖據各處
奏報及往來官吏皆言賊匪不過烏合之衆毫無

伎倆但前此高札同興所得勝仗或係於附近村莊殲戮零匪數百人或係賊來攻撲官兵奮勇擊退均不能進攻賊營卽昨日溫承惠於滑縣途次所剿賊衆亦係沿途剿殺尙未及大股賊巢那彥成身爲總統大兵現已四路雲集當探賊衆屯聚緊要之區併力進剿能一兩仗大獲全勝先將渠魁殄滅其餘散竄匪徒再以次搜拏則辦理迅速

可計日以待成功那彥成受朕厚恩今付以統兵
重任惟當一意除賊安民凡軍營應行調遣布置
各事宜果計出萬全卽迅速辦理正不必一一條
陳請朕指示兵貴神速機宜朝夕不同往返遷延
於事無益朕惟竚待捷音那彥成不可不勉之又
勉也再節據同興奏報東省兩次剿賊皆係運使
劉清叅將馬建紀二員帶兵獲勝總兵陳廣寧係

帶兵大員總未親身臨敵殊爲可詫伊現在何處
著那彥成據實查明如該總兵畏賊遷延卽嚴行
叅奏其兗州鎮總兵員缺現有候補總兵徐錕在
軍營効力卽奏請補授又前日據高杞叅奏河南
蘭陽縣童泰初將難民二千餘人渡至南岸因其
摺內奏稱黃河南岸亦有勾連蠢動之機恐奸匪
潛往勾結該縣不加詳慎不得不嚴辦示懲特降

旨將該員革職柳號現在南岸並無蠢動看來童
泰初所渡或實係難民此時黃河渡口稽查盤詰
不能不嚴倘沿河文武各官因童泰初獲罪凡老
弱難民一概不加撫卹全令被賊戕害殊覺於心
不忍甚或迫而從賊所關甚鉅著那彥成查明黃
河以南現無勾結蠢動情事卽將童泰初先行開
柳飭令該革員在河干幫同防守稽查如能認真

出力再行奏請加恩開復

是日未刻百齡奏言竊臣馳抵徐郡後先將已

到之淮安河營官兵酌派分赴豐沛碭山扼要

駐守臣周歷徐州城垣相度形勢該處地當南

北通衢存兵無幾又無本營大員督率守禦民

情甚爲驚懼臣隨將陸續趕到之官兵派留二

百五十名并飭令府縣添募安實鄉壯於郡城

上下內外密佈巡防復查有徐州鎮標告請終
養之遊擊沙念聖久歷戎行當卽令其督率訓
練遠近居民均已照常安堵連日探報東省匪
徒俱在城武定陶曹縣一帶村莊屯聚臣密行
委員改裝潛入賊營探知匪徒所據之村莊大
小不一接連橫亘約有四五十里晝出夜伏裹
脅年壯有力者逼充頭陣又分遣匪黨赴各處

探路勾結臣於郡城安置妥協後卽率同河庫道徐炘叅將馬濟勝戴文星帶江寧官兵六百五十名前往豐沛一帶察看情形與沈洪樊雄楚籌商剿堵之策適奉

諭旨令沈洪帶兵一千名前赴東省與同興會合夾擊當卽令該鎮率同原帶官兵於初五日迅速起程由西北單曹定陶城武一帶探蹤前進臣

諄囑該鎮恪遵

訓諭以剿爲堵不可繞道徑赴同興曹州軍營致使
後路賊匪伺虛南竄惟該鎮以一旅之師赴境
深入必須後有官兵緊躡方足壯其聲援臣現
又選派叅將馬濟勝挑帶健勇官兵二百名跟
接前進並遴派候補知縣劉鈐縣丞張景沂等
攜帶餉項照例酌備一月口糧俟深入鄰境後

再由各該地方支應臣竊思攻剿之機固貴神速而守禦之計尤忌空虛江境豐沛蕭碭分列黃河南北兩岸袤延五六百里如豐縣之劉家集首羨集碭山之馬良集楊家集或東北面與東豫錯壤或西南面與皖豫連疆形勢最爲衝要此時沈洪業經撤兵他往烏爾卿額尙未帶兵前來亟應就現有之兵先留分撥以備不虞

臣當令總兵樊雄楚叅將戴文星帶兵四百名
在鎮臣沈洪原駐之劉家集防守遊擊潘遇龍
帶兵二百名在首羨集防守並令徐州道王逢
源添募鄉壯協同照料遊擊楊昇帶兵二百名
在馬良集防守令候補道毓岱添募鄉壯協同
照料叅將竒里克特都司徐彬帶兵五百五十
名在楊家集防守派候補知府張丕昌協同料

理此係酌量兵數暫爲分佈其中兵單地要之

處甚多仍飛催提

臣

烏爾卿額帶兵迅速來徐

再行擇要添駐

臣

復通盤籌畫此時安徽潁亳

一帶被水各州縣半與豫省接壤民情强悍誠

恐乘間滋事昨壽春鎮

臣

喀勒吉善業經回任

路過徐城

臣

囑令該鎮速赴潁亳一帶實力堵

禦并令副將陳均暫在壽州彈壓查徐州所屬

之銅山睢寧蕭縣界在東南與安徽省鳳泗蒙宿等處亦均切近必須設兵扼要防護現將提臣前次挑備官兵二千名內檄調一千名來徐俾處處防禦有資以鎮災黎而固邊境又邳州黃林莊宿遷白洋河等處逼近運道爲漕船經由之所亦關緊要先經臣派令河標遊擊邢洛書馬爲激各帶弁兵分赴兩岸巡防足資保護臣

現將各路設兵事宜部署完竣俟提臣到日詳
晰告知卽趕回徐城駐紮相機調度再臣准方
受疇咨會以豫省商邱劉家口緊要令臣將派
守碭山之官兵量移防守查碭山縣迤西楊家
集地方係江境黃河南岸扼要之區該處距商
邱劉家口亦不甚遠本可遙爲聲援今將楊家
集所駐弁兵酌量分撥在豫省虞城縣境內駐

防離劉家口更近仍歸派守楊家集之將領統
率稽查聲勢互相聯屬於江豫兩省邊防均有
裨益奏入

上命軍機大臣傳諭那彥成溫承惠同興日早間接
據那彥成條陳軍務各款正在降旨飭諭間未刻
接到百齡奏報據稱探聞東省匪徒俱在城武定
陶曹縣一帶村莊屯聚經該督密行委員改裝潛

入賊營探知賊匪所據之村莊接連橫亘約有四
五十里晝出夜伏裹脅年壯有力者逼充頭陣又
分遣匪徒赴各處探路勾結等語看來東省賊匪
尙多未見窮蹙現在豫省賊匪有那彥成自西面
帶兵前來溫承惠由北面轉戰又有高杞在彼夾
擊兵威壯盛賊匪一經接仗諒必潰敗但揆度賊
情潰敗之後斷不敢竄向西北惟東省守備空虛

同興一路兵力尙單沈洪亦祇一旅之師未足深恃江南豐沛一帶雖有百齡在彼防堵江省兵力輒弱亦恐堵禦不周若濬滑賊匪竄向東南則與定曹之賊合勢南趨恐山東江南完善之區又被其蹂躪辦理需時那彥成等總統師干當通籌全局四面兼顧現在那彥成所統帶兵將領甚多各處所調之兵亦剋期雲集當分派勇幹得力大員

帶領勁兵繞道由東南一帶先遏其去路約會同
興由東向西逼剿使賊與西北兩路大兵相值則
三面夾擊可期一鼓殲除該大臣等萬不可稍存
畛域之見使賊趨向東南務審度機宜計出萬全
爲要

上又命軍機大臣傳諭百齡曰賊匪在定曹一帶佔
據村莊橫亘四五十里看來賊勢尙衆現在那彥

成已接受欽差大臣關防會同溫承惠高杞等由
衛輝一路進兵攻剿滑縣屯聚賊匪刻已飭知那
彥成等務須通籌全局勿專事西路一面進攻致
賊匪東竄并令同興在東省進剿務須由東面逼
賊西奔以收兩面夾擊之效百齡此時在徐州一
帶當悉力防堵現在沈洪已赴曹縣一帶當飛催
烏爾卿額迅速帶兵前來邊界協力防堵江境完

善之區不可使賊匪一名竄入

十月初十日癸卯同興奏言查韓家大廟等處賊

匪經官兵痛剿之後紛紛竄赴曹縣扈家集附

近又有安陵集俱係賊巢藏匿最多恐其勾結

蔓延隨經

奏明知會溫承惠派兵由東明兜剿一面分差密

探偵明實在情形原欲會兵爲一鼓殲除之計

茲據探弁回稱該匪等因畏懼官兵有欲奔逃
滑縣合夥之信查滑縣賊勢現已猖獗若此處
再任竄往則滑縣賊匪又添羽翼必須剿捕以
分其勢當卽飛飭運司劉清協領哈哈岱叅將
馬建紀由定陶帶兵攻扈家集之東都司周添
章帶兵由曹縣攻其南臣由曹縣督飭副將寧
德遊擊五達色帶兵攻其北俱於初四日子刻

起程同時並發連夜疾走至黎明運使劉清等帶兵先到因該逆匪將集外四圍築起土牆牆外又砍伐樹株荆棘堆圈成寨約四五里極其厚密官兵到時該匪等卽鳴鑼聚衆各執刀矛直撲隊伍官兵當用排鎗攻擊該匪等退伏牆下官兵奮勇攻入刀鎗砍扎該匪等始猶抗拒繼卽避入屋內官兵搶入當用火毯拋擲趁風

延燒火焰大起賊匪不能屯聚紛紛突出經官
兵四面圍合鎗箭齊發剿戮無數其藏匿屋內
者均被燒盡零匪向北奔竄馬隊隨後追剿值
寧德五達色帶領官兵亦到迎頭堵截該匪等
又復南奔正遇都司周添章領兵前來一路攔
剿自辰至午共誅賊匪二千餘人生擒百餘人
並據兵丁王吉昌吳奪魁擒獲僞副元帥王奇

山一犯訊據供稱定曹賊首卽係扈家集朱成
良朱成貴朱成珍等弟兄先本聽滑縣卦主李
文成約會定於九月十五日從滑縣濬縣長垣
定陶曹縣單縣城武金鄉魚臺濟南府省城一
齊動手因朱成珍並城武縣之張建木金鄉縣
之崔士俊等先後被獲該匪等糾約不及遂於
初十日起事緣各處有備祇搶曹定二縣朱成

軍營著有勞績朕所深知今年逾六旬且係文職
能身率士卒直取賊巢殲賊多名實屬勇敢可嘉
運司劉清著加恩賞加布政使銜卽換頂戴并賞
給四喜玉搬指一個花大荷包一對小荷包二個
叅將馬建紀奮勇出力著加恩賞給副將銜卽換
頂戴并賞給四喜玉搬指一個其擒獲賊目王奇
山之兵丁王吉昌吳奪魁二人著加恩以外委拔

補并著每人酌賞銀數十兩以示獎勵發去瑤
翎管十個松石搬指五個瑪瑙搬指五個皮搬指
套十個著同興分賞出力員弁一兩重銀鏤二百
個五錢重銀鏤二百個分賞出力兵丁叅將馬建
紀協領哈哈岱如再有奮勇出力之處該撫另行
保奏候朕加恩此外在事各弁兵等若有剿捕奮
勉尤爲出色者著同興查明秉公據實保奏勿稍

冒濫

上命軍機大臣傳諭同興曰同興此次接仗將賊匪
痛加剿洗聲威大振亟應乘此兵勢將安陵集屯
聚賊匪一併殲除廓清東境賊匪本有與滑縣賊
匪合夥之意今被剿窮蹙必向豫省奔竄那彥成
溫承惠等在西北兩面帶兵同興務將剿敗之賊
匪由東南一路逼向西北卽帶領勝兵跟蹤追殺

約會那彥成等併力夾攻以期一舉蕩平現在蘇爾慎帶領巴圖魯侍衛等四人俱已到營此數人皆可以一當百蘇爾慎尤出衆驍勇昨據那彥成奏派多隆武閔俊烈二人馳赴東省帶兵該二員熟悉東省情形打仗奮勇該省添此得力將弁定可連奏捷音現在擒獲賊犯并著同興派員嚴鞫令其將夥黨賊目據實供吐一併查拏倘有要犯

潛匿京畿附近地方卽由驛奏聞以便迅速查緝
再東省連次剿賊皆係運使劉清叅將馬建紀等
帶兵前往獲有勝仗總兵陳廣寧係帶兵大員總
未親身臨敵殊爲可詫如係該總兵畏賊遷延卽
行據實嚴叅不可瞻徇迴護

十月十二日乙巳同興奏言竊臣於初七日將剿
滅扈家集賊巢具奏後查安陵集聚賊尙多當

同副都統蘇爾慎商定卽於初七日發兵派撫
標遊擊五達色候補遊擊班金布青州副前鋒
翼長伍爾滾佈等隨同蘇爾慎巴圖魯等帶領
滿漢兵四百名又派叅將段琨遊擊胡報國都
司李德帶兵四百名分兩路往剿臣隨督同副
將福寧阿候補叅將那清阿帶兵三百名在後
接應初八日黎明齊抵安陵集東北劄住守備

劉興隆前往偵探途遇奸細五人騎馬而來當
卽殲斃兩名其三人飛奔回集蘇爾慎卽帶福
英阿色爾果善吉爾彰阿扎玉善並叅遊等官
躡蹤追抵安陵集該匪等放礮鳴鑼齊出迎拒
數百人捨命撲扎經官兵四面兜剿立殺二百
餘人該匪見官兵奮勇不敢迎敵紛紛逃竄適
副將福寧阿叅將那清阿領兵接應迎頭截殺

蘇爾慎帶巴圖魯等緊追兜剿射殺甚衆餘匪均被縛獲乘勝赴附近之劉家崗等小莊五處搜捕當又生擒賊匪一百餘名此次共殺逆匪六百餘人生擒二百餘人奪獲騾馬六十三匹大小車二十二輛旗幟鎗刀線鎗三百餘件搜查該匪等家屬已先期逃去其餘良民及婦女等問明卽予省釋留段琨等帶本隊之兵在安

陵集紮駐同時據派駐定陶之叅將馬建紀稟
報探有賊匪數百人大車數十輛馬十餘匹從
滑縣潛奔定陶之郝家集因聞扈家集大巢已
破仍欲折回奔逃該叅將馬建紀卽會同運司
劉清協領哈哈岱分兵前往迎剿兩路夾擊賊
匪捨命狂奔官兵追殺二十餘里殺斃賊匪四
百餘人奪獲騾馬大車二十五輛並旗幟器械

牲口甚多生擒賊目曹光輝射斃偽元帥袁興
邦偽大將軍周姓均有白紬白布大旗直書該
賊目偽職名姓現將曹光輝嚴審等情又據充
沂曹濟道熊方受稟稱都司周添章探知榮家
菜園有賊營一處周圍用樹木環繞當卽率領
兵弁分爲三路前進賊匪湧出拒敵官兵奮勇
向前賊衆不能抗拒復奔逃至李家樓宗家堂

兩處該都司等盡力窮追共斃賊三百餘人平
燬賊巢三處各等語臣查東省官兵於初六七
八三日內連破扈家集及安陵集劉家崗郝家
集榮家菜園李家樓宗家堂等大小十一處賊
巢賊黨幾盡不難卽日肅清惟聞直豫兩省現
亦督兵進剿誠恐該匪等折竄東境必須派兵
防堵遂分飭叅將段琨常鳴盛遊擊胡報國帶

兵一千名於東境扼要地方相度地勢劄營堵
剿臣現在會同蘇爾慎陳廣寧督飭各將弁搜
捕定曹附近村莊潛匪務期淨盡以安閭閻至
徐州鎮總兵沈洪已帶兵於本月初八日馳抵
曹縣西南一路足資堵剿臣俟將附近開州東
明一帶扼要處所分兵防備妥協卽會同蘇爾
慎等劄營定陶以資策應留總兵陳廣寧防守

曹州接應後路再此次進剿安陵集劉家崗等處副都統蘇爾慎帶同巴圖魯福英阿等首先迎敵果敢出力運司劉清等屢次帶兵連獲勝仗兗沂曹濟道熊方受當逆匪滋事之時在工防汛一聞警報卽趕赴曹縣督率官弁兵夫嬰城固守俾奸匪不敢窺伺署金鄉令吳堦鉅野令王朝恩防守周密得保城垣並俱緝獲要犯

甚屬出力相應據實保奏可否施恩鼓勵出自

聖恩

同日廣厚戴均元奏言竊_臣等欽奉

諭旨將睢工堵築事宜暫行停止正在遵辦間適據

東壩員弁拏獲賊犯朱得三搜出紙爆三個據

供有曹縣許家寨教匪許天一指使來工探視

情形並給與紙爆囑令乘間在稽梁內放火以

便許天一等前來接應又供有張國志劉天祥
王天一等亦帶紙爆來工並有侯文志劉天貴
劉起俊劉三張志等或裝扮乞丐或推挽土車
俱在西壩等語又拏獲蔡景華一名查驗髮辮
下用艾炙去頭髮一小塊係會匪記號據供係
曹縣首逆蔡五倫之族孫蔡五倫令其潛來東
壩探視等語查該匪徒等膽敢肆出窺伺潛來

工次意存叵測實堪憤恨仰見

聖明睿照機先無遠弗屆現飭道府將所獲各犯嚴
訊解省辦理均奏入

上諭內閣曰同興奏曹定賊匪自剿平扈家集賊營
尙有賊衆屯聚安陵集該撫分派將領兵丁於初
八日齊抵該處賊匪放礮鳴鑼迎拒當經官兵四
面兜圍立殺二百餘人該匪等紛紛逃竄經蘇爾

慎帶領巴圖魯侍衛等緊追兜剿射殺多名餘匪
俱被擒縛乘勝又將附近該集之劉家崗等五處
村莊搜捕生擒賊匪一百餘名共殺逆匪六百餘
人生擒二百餘人奪獲騾馬車輛旗幟刀鎗無筭
又有另股賊匪數百人從滑縣奔來潛聚定陶之
郝家集經叅將馬建紀會同運司劉清協領哈哈
岱分兵追剿殺斃賊匪四百餘人生擒賊目曹光

金瓶梅詞話卷之五十一
三十一

輝射斃僞元帥袁興邦僞大將軍周姓并據兗沂
曹濟道熊方受稟稱曹縣之榮家菜園有賊營一
處都司周添章率領弁兵殲賊三百餘人平燬賊
巢三處此次官兵三路於初六初七初八三日內
連破大小賊巢十一處曹定賊匪殲擒殆盡所辦
甚好除帶兵之運司劉清叅將馬建紀前次甫經
加恩外副都統銜蘇爾慎巴圖魯侍衛福英阿色

爾果善吉爾彰阿扎玉善甫到軍營卽奮勇進剿
斃賊多名俱着加恩交部議敘並賞給蘇爾慎四
喜玉搬指一個白玉翎管一個黃瓣大荷包一對
小荷包二個磁搬指套一個福英阿色爾果善吉
爾彰阿扎玉善四人磁搬指各一個瑤瑯翎管各
一個磁搬指套各一個協領哈哈岱連次剿賊得
有勝仗着加恩賞戴花翎道員熊方受偵探賊蹤

分派弁兵殲賊多名實屬勇往着加恩賞戴花翎
哈哈岱熊方受俱仍交部議敘署金鄉縣候補知
縣吳堦拏獲賊首崔士俊及匪黨四十餘人並能
防守城池誅捕餘匪吳堦着卽陞補桃源同知鉅
野縣知縣王朝恩拏獲賊首張建木及匪徒多人
著加恩以同知卽用俱先換頂戴其三路兵丁除
防守外凡臨陣打仗者著查明俱賞給一月錢糧

上命軍機大臣傳諭同興曰東省賊匪經該撫連次
剿辦將大股屯聚之賊殲斃殆盡當趁此兵威將
零星賊衆逼向西北一面剿殺摺內稱聞直豫兩
省現亦督兵進剿恐有竄入東境之股須於各要
口派兵防堵所見甚是此時東省賊勢已衰若直
豫再得勝仗則三面兜圍將殘匪逼歸一處正如
釜底游魂不難一鼓殲除同興及劉清馬建紀等

所帶俱係東省官兵祇在本境堵剿不必深入豫境如三省官兵聚集一處該匪等被直豫大兵剿急復向東南奔逸曹州一帶後路空虛轉防疎失惟蘇爾慎等本係派往帶兵打仗之員如東省已無大股可剿之賊著同興酌分弁兵交與帶往協同直豫大兵合剿可資得力同興自督率東省將領將竄散零匪實力搜捕以淨根株若稍存姑息

將就了事之心則非大清國之臣子朕亦斷不容
此負恩之徒慎之其曹縣西南一路有沈洪帶兵
堵禦着該撫斟酌情形若山東江南邊境防堵嚴
密可保無虞卽令該總兵進剿亦可該撫務通盤
籌畫以保萬全其現獲賊匪並着同興派員嚴訊
該匪等蓄意謀逆是否皆聽林清主使其起事日
期是否林清遣人前往約會此外有無緊要夥黨

務將逆情盡行究出奏聞辦理

臣等謹案姑息養奸貽害甚鉅其事由于積漸而其毒中于無形三省教匪初不過三五亂民煽惑鄉曲一經懲創其害遂絕無如地方官存畏難苟安之心徂化大爲小之見或故縱不辦或辦之不力以至徒黨日熾曹定問滋事賊匪皆由東省官員平時姑息釀成

今不得已徵兵剿辦仰仗

天威震叠連戰克捷傾其巢穴十餘處殲賊數千大
局畧定然伏匿散竄之賊在所不免若復心
存姑息則燎原之火甫滅遺燼仍然滋蔓之
草雖除萌芽復殖恐其患仍未已我

皇上於同興奏報安陵等處賊巢掃蕩之後

諭令實力搜捕務盡根株並

誠以姑息負恩咎難末減該撫畏懼稟遵不敢將就
了事是以數月之後搜捕淨盡不留遺孽全
境遂報肅清良由

睿慮深長

訓詞嚴切也

上又命軍機大臣傳諭戴均元方受疇曰戴均元等
奏拳獲潛至東壩欲行放火之賊犯朱得三並來

探信之賊犯蔡景華究出夥賊多名等語賊匪詭
詐百出朕早料壩工人夫混雜必有乘間潛往偷
燒稽燬之事今據賊犯所供果不出意料幸而壩
工停止奸人無計可施除已獲之朱得三蔡景華
二犯卽行嚴訊正法外其餘未獲之許天一張國
志劉天祥王天一侯文志劉天貴劉起俊劉三張
志九犯着方受疇遴委員弁趕緊緝拏務期按名

弋獲訊明嚴辦恐該犯等就近逃入江安邊境並
着方受疇移咨百齡胡克家一體嚴拏辦理

是日董誥等奏言續經訊明逆犯緣坐家屬請
將從逆太監楊進忠養子趙增張太之父張大
成及首先率賊滋事逆犯陳文魁之父陳老卽
陳煜均依律擬斬其餘犯屬等二十三名口分
別發遣等因得

旨趙增張大成陳老卽陳煜均著卽處斬餘依議

同日文孚朱錫爵奏言竊臣文孚遵

旨前赴東昌自京起程途次在平適與臣朱錫爵相

晤同抵東昌連日會同將軍需糧餉一切事宜

妥議章程其東昌迤南曹州迤北沿途經由各

州縣均已飭令多設車輛以資轉運至提支藩

運兩庫錢糧除已經支用外其未經支用及續

經撫臣提銀三十萬兩亦一併收貯東昌府庫
以後軍需均由臣文孚核明辦理臣朱錫爵卽
回省彈壓奏入報

聞